

Hargai kemerdekaan tanah air

USIA 61 tahun kemerdekaan telah banyak mengubah landskap negara sama ada dari segi sosial, ekonomi maupun politik.

Dihuni oleh penduduk pelbagai bangsa dan agama, rakyat perlu bersyukur kerana kita tidak pernah berdepan konflik kekerasan keterlaluan seperti yang dialami oleh Muslim Bosnia dan etnik Rohingya di Myanmar.

Begitu pun, itu bukanlah alasan untuk rakyat negara ini terutamanya generasi milenial untuk bersikap sambil lewa terhadap pentingnya peranan perpaduan kaum dalam pembinaan negara bangsa.

Pensyarah Jabatan Pengajian Kenegaraan dan Ketamadunan Fakulti Ekologi Manusia, Universiti Putra Malaysia, Prof. Madya Dr.



MOHD. IZANI

Mohd. Izani Mohd. Zain berkata, perpaduan adalah sesuatu yang hanya boleh dicapai jika setiap orang memainkan tanggungjawab dan peranan masing-masing.

“Kesepaduan itu adalah perkara yang memerlukan penglibatan semua pihak. Apa yang perlu rakyat faham ialah kita tidak hidup hanya dalam satu kumpulan yang mempunyai minat, kepentingan dan hak yang sama.

“Justeru, sifat tanggungjawab adalah perkara yang paling penting dalam memacu perpaduan negara. Tanpa sikap ini, individu akan cenderung bersikap pentingkan diri, tidak bertoleransi dan ego sekali gus menjadi faktor perbalahan yang akhirnya merugikan negara,” katanya ketika dihubungi *Kosmo!* baru-

baru ini.

Tambah Mohd. Izani, menurut pemerhatiannya, telah mula wujud unsur tidak sihat dalam kalangan masyarakat kita dengan sentimen mengenai penentuan hak, dan ketidaksamarataan sering dimainkan terutamanya di media sosial.

“Harus diingat, antara faktor peperangan maupun tindakan tidak berperikemanusiaan seperti genosid secara umumnya adalah berlaku kerana pertikaian hak.

“Boleh bercakap dan memperjuangkan hak, namun letakkan tanggungjawab anda sebagai seorang rakyat yang bertamadun di hadapan. Dari situ, anda pasti dapat menilai medium terbaik meluahkan pendapat sekali gus mengelak menyebut dan menyentuh hal sensitif melibatkan kaum lain,” jelasnya.